

#### 中华古典精华文库

# 神农本草经

## 目录

| 上卷    | 01 |
|-------|----|
| 中卷    |    |
| 玉石部上品 | 03 |
| 玉石部中品 | 06 |
| 玉石部下品 | 08 |
| 草部上品  |    |
| 草部中品  | 17 |
| 草部下品  | 24 |
| 木部上品  | 31 |
| 木部中品  | 34 |
| 木部下品  |    |
| 下卷    |    |
| 虫兽部上品 | 39 |
| 虫兽部中品 | 42 |
| 虫兽部下品 | 45 |
| 果菜部上品 |    |
| 果菜部中品 | 50 |
| 果菜部下品 | 51 |
| 米谷部上品 | 52 |
| 米谷部中品 | 53 |
| 米谷部下品 | 54 |

神农本草经 .1.

### 神农本草经上卷

上药一百二十种为君,主养命以应天,无毒,多服久服不伤人,欲轻身益气不老延年者,本《上经》。

中药一百二十种为臣,主养性以应人,无毒,有毒,斟酌 其宜,欲遏病补虚羸者,本《中经》。

下药一百二十种为君,主治病以应地,多毒,不可久服, 欲除寒热邪气、破积聚、愈疾者,本《下经》。

药有君臣佐使,以相宣摄合和者,宜用一君二臣五佐,又 可一君三臣九佐使也。

药有阴阳配合,子母兄弟,根茎花实草石骨肉。有单行者,有相须者,有相使者,有相畏者,有相恶者,有相反者,有相 杀者。凡此七情和合视之,当用相须相使良者,勿用相恶相反者。若有毒宜制,可用相畏相杀者,不尔,勿合用也。药有酸 咸甘苦辛五味,又有寒热温凉四气及有毒无毒,阴干暴干,采治时日,生熟,上地所出,真伪陈新,并各有法。

药性有宜丸者,宜散者,宜水煮者,宜酒浸者,宜膏煎者,

神农本草经

亦有一物兼宜者,亦有不可入汤酒者,并随药性,不得违越。

凡欲治病,先察其源,先候病机。五脏未虚,六腑未竭,血脉未乱,精神未散,服药必活。若病已成,可得半愈。病势已过,命将难全。

若用毒药疗病,先起如黍粟,病去及止。不去,倍之;不去,十之。取去为度。治寒以热药,治热以寒药。饮食不消,以吐下药。鬼注蛊毒,以毒药。痈肿疮瘤,以疮药。风湿,以风湿药。各随其所宜。

病在胸鬲以上者,先食后服药。病在心腹以下者,先服药 而后食。病在四肢血脉者,宜空腹而在旦。病在骨髓者,宜饱 满而在夜。

夫大病之主,有中风、伤寒、温疟、中恶、霍乱、大腹、水肿、肠澼下利、大小便不通、贲肫、上气、咳逆、呕吐、黄疸、消渴、留饮、澼食、坚积癥瘕、惊邪、癫痫、鬼注、喉痹、齿痛、耳聋、目盲、金创、踒折、痈肿、恶疮、痔、瘘、瘿瘘、男子五劳七伤、虚乏羸瘦,女子带下、崩中、血闭,虫蛇蛊毒所伤,此皆大略,宗兆。其间变动枝节,各宜依端绪以取之。

神农本草经 .3.

### 神农本草经中卷

#### 玉石部上品

玉泉味甘平。主治五脏百病。柔筋强骨、安魂魄、长肌肉、益气,久服耐寒暑,不饥渴,不老神仙。人临死服五斤,死三年色不变。一名玉札。

丹沙味甘微寒。治身体五脏百病。养精神、安魂魄、益气、明目,杀精魅邪恶鬼。久服通神明不老。能化为汞。生山谷。

水银味辛寒。主治疥瘙痂疡百秃,杀皮肤中虫虱,堕胎,除热。杀金银铜锡毒,熔化还复为丹。久服神仙不死。生平土。

空青味甘寒。主治青盲、耳聋。明目,利九窍,通血脉, 养精神。久服轻身延年不老。能化铜铁铅锡作金。生山谷。

曾青味酸小寒。主治目痛,止泪出,风痹,利关节,通九窍,破癥瘕积聚。久服轻身不老。能化金铜。生山谷。

白青味甘平。主明目,利九窍,耳聋,心下邪气。令人吐, 杀诸毒三虫。久服通神明,轻身延年不老。生山谷。 云母味甘平。主治身皮死肌,中风寒热如在车船上,除邪气,安五脏,益子精,明目,轻身延年。一名云珠,一名云华,一名云英,一名云液,一名云沙,一名鳞石。生山谷。

朴消味苦寒无毒。主治百病,除寒热邪气,逐六腑积聚、结固留癖。能化七十二种石。炼饵服之,轻身神仙。生山谷。 消石味苦寒。主治五脏积热,胃胀闭。涤去畜结饮食,推陈致 新,除邪气。炼之如膏,久服轻身。一名芒硝。生山谷。

砚石味酸寒。主治寒热泄利,白沃阴蚀,恶疮目痛,坚骨齿。炼饵服之,轻身不老增年。一名羽涅。生山谷。

滑石味甘寒。主治身热泄澼,女子乳难,癃闭。利小便,荡胃中积聚寒热,益精气。久服轻身、耐饥,长年。生赭阳山谷。

紫石味甘平。主治心腹欬逆邪气,补不足,女子风寒在子宫,绝孕十年无子。久服温中、轻身、延年。生太山山谷。

白石英味甘微温。主治消渴,阴痿不足,欬逆,胸膈间久寒。益气,除风湿痹。久服轻身、长年。生山谷。

青石赤石黄石白石黑石脂等味甘平。主治黄疸、泄利、肠 澼脓血、阴蚀、下血赤白、邪气、痈肿、疽痔恶疮、头疡、疥瘙。久服补髓益气,肥健,不饥,轻身,延年。五石脂,各随 五色补五脏。生山谷。

神农本草经 .5.

太一禹余粮味甘平。主治咳逆上气、癥瘕、血闭、漏下,除邪气。久服耐寒暑不饥,轻身飞行千里神仙。一名石脑。生山谷。

禹余粮味甘寒。主治咳逆、寒热、烦满,下利赤白,血闭癥家大热。炼饵服之,不饥、轻身、延年。生池泽。

雄黄味苦平。主治寒热鼠瘘,恶疮疽痔,死肌,杀精物恶鬼邪气百虫毒,胜五兵。炼食之,轻身神仙。一名黄食石。生山谷。

#### 玉石部中品

石胆味酸小寒。主明目目痛,金创诸痫痉,女子阴蚀痛,石淋寒热,崩中下血,诸邪毒气,令人有子。炼饵服之不老,久服增寿神仙。能化铁为铜、成金银。一名毕石,生山谷。

石钟乳味甘温。主治咳逆上气,明目益精,安五脏,通百节,利九窍,下乳汁。生山谷。

雌黄味辛平。主治恶疮头秃痂疥,杀毒虫,身痒,邪气, 诸毒。炼之久服,轻身、增年、不老。生山谷。

殷孽味辛温。主治爛伤瘀血,泄利寒热,鼠瘘,癥瘕结气。 一名姜石。生山谷。

孔公孽味辛温。主治伤食不化,邪结气,恶疮疽瘘痔,利 九窍,下乳汁。生山谷。石流黄味酸温有毒。主治妇人阴蚀, 疽痔恶血,坚筋骨,除头秃,能化金银铜铁奇物。生山谷中。

阳起石味酸无毒。主治崩中漏下,破子藏中血,癥瘕结气, 寒热腹痛,无子,阴痿不起,补不足。一名白石。生奇山山谷。

凝水石味辛寒。主治身热,腹中积聚邪气,皮中如火烧, 烦满。水饮之。久服不饥。一名白水石。生山谷。 神农本草经 .7.

慈石味辛寒。主治周痹风湿,支节中痛,不可持物,洗洗酸痛,除大热烦满及耳聋。一名玄石。生山谷。

理石味辛寒。主治身热,利胃解烦,益精明目,破积聚,去三虫。一名立制石。生山谷。长石味辛寒。主治身热,四肢寒厥,利小便,通血脉,明目去翳,眇,去三虫,杀蛊毒。久服不饥。一名方石。生山谷。

肤青味辛。主治蛊毒,毒蛇,菜肉諸毒,恶创。一名推青。 生山谷。

铁落味辛平。主治风热恶创,疡疽创痂疥,气在皮肤中。 铁,主坚肌耐痛。铁精主明目化铜。生平泽。

#### 玉石部下品

石膏味辛微寒。主治中风寒热,心下逆气惊喘,口干舌焦不得息,腹中坚痛,除邪鬼,产乳,金创。生山谷。

青琅玕味辛平。主治身痒、火创、痈伤、疥瘙、死肌。一 名石珠。生平泽。

攀石味辛有毒。主治寒熱鼠瘘,蚀疮、死肌、风痹,腹中坚,邪气,除热。一名青分石,一名立制石,一名固羊石。生山谷。

代赭味苦寒。主治鬼注、贼风、蛊毒,杀精物恶鬼,腹中毒邪气,女子赤沃漏下。一名须丸。生山谷。

卤咸味苦咸寒。主治大热,消渴,狂烦,除邪,及吐下蛊毒,柔肌肤。大盐,令人吐。戎盐,明目,目痛,益气,坚肌骨,去蛊毒。生池泽。

白垩味苦温。主治女子寒热癥瘕、月闭、积聚、阴肿痛,漏下,无子。生山谷。

铅丹味辛微寒。主治咳逆胃反,惊痫癫疾,除热下气。炼 化还成九光。久服通神明。生平泽。 神农本草经 .9.

粉锡味辛寒。主治伏尸毒螫,杀三虫。锡铜镜鼻,主治女子血闭,癥瘕伏肠,绝孕。一名解锡。生贵阳山谷。

石灰味辛温。主治痈疡疥瘙,热气,恶疮癞疾,死肌堕眉, 杀痔虫,去黑子息肉。一名恶灰。生山谷。

冬灰味辛微温。主治黑子,去疣息肉,疽蚀疥瘙。一名藜灰。生川泽。

神农本草经 . 10 .

#### 草部上品

青芝味酸平。主明目,补肝气,安精魂,仁恕。久食轻身不老,延年神仙。一名龙芝。生山谷。

赤芝味苦平。主治胸中结,益心气,补中,增智慧,不忘。 久食轻身不老,延年神仙。一名丹芝。生山谷。

黄芝味甘平。主治心腹五邪,益脾气,安神,忠信和乐。 久食轻身不老,延年神仙。一名金芝。生山谷。白芝味辛平。 主治咳逆上气,益肺气,通利口鼻,强志意勇悍,安魄。久食 轻身不老,延年神仙。一名玉芝。生山谷。

黑芝味咸平。主治癃,利水道,益肾气,通九窍,聪察。 久食轻身不老,延年神仙。一名玄芝。生山谷。

紫芝味甘温。主治耳聋,利关节,保神,益精气,坚筋骨, 好颜色。久食轻身不老,延年神仙。一名木芝。生山谷。

天门冬味苦平,主治诸暴风湿偏痹,强骨随,杀三虫,去 伏尸。久服轻身益气延年。一名颠勒。生山谷。

术味苦温。主治湿痹、死肌、痉疸,止汗除热,消食,化 煎饵。久服轻身、延年不饥。一名山蓟。生郑山山谷。委萎味 甘平。主治中风暴热不能动摇,跌筋结肉,诸不足,久服去面 鼾,好颜色润泽,轻身不老。生川谷。

干地黄味甘寒。主治折跌绝筋伤中,逐血痹,填骨髓,长 肌肉。做汤,除寒热积聚,除痹。生者尤良。一名地髓。生川 泽。

菖蒲味辛温。主治风寒湿痹,咳逆上气,开心孔,补五脏,通九窍,明耳目,出音声。久服轻身,不忘,不迷惑,延年。 一名昌阳。生池泽。

远志味苦温。主治咳逆伤中,补不足,除邪气,利九窍, 益智慧,耳目聪明,不忘,强智倍力。久服轻身不老。叶名小草。一名葽绕,一名细草。生川谷。

泽泻味甘寒。主治风寒湿痹,乳难,消水,养五脏,益气力,肥健。久服耳目聪明,不饥,延年轻身,面生光,能行水上。一名水泻,一名芒芋,一名鹄泻。生池泽。

署豫味甘小温。主治伤中,补虚羸,除寒热邪气,补中益气力,长肌肉。久服耳目聪明,轻身不饥延年。一名山芋。生山谷。

菊华味苦平。主治风头,头眩肿痛,目欲脱,泪出,皮肤死饥,恶风湿痹。久服利血气,轻身耐老延年。一名节华。生川泽。

神农本草经 . 12.

甘草味甘平。主治五臟六腑寒热邪气,坚筋骨,长肌肉, 倍力,金创,尰,解毒,久服輕身延年。生川谷。

人參味甘小寒。主補五臟,安精神,定魂魄,止惊悸,除 邪气,明目,开心益智。一名人衔,一名鬼盖。生山谷。

石斛味甘平。主治伤中,除痹下气,补五脏虚劳羸瘦,强阴。久服厚肠胃,轻身延年。一名林兰。生山谷。

石龙芮味苦平。主治风寒湿痹,心腹邪气,利关节,止烦满。久服轻身明目不老。一名鲁果能,一名地椹。生川泽。

牛膝味苦(酸)平。主治寒湿痿痹,四肢拘挛,膝痛不可屈伸,逐血气,伤热火烂,堕胎。久服轻身耐老。一名石倍。 生川谷。

独活味苦平无毒。主治风寒所出,金创,止痛,賁豚痫痉, 女子疝瘕。久服轻身耐老。一名羌活,一名羌青,一名护羌使 者。生川谷。升麻味甘平。主解百毒,杀百精老物殃鬼,辟温 疫瘴邪蛊毒。久服不夭,轻身长年,一名周升麻。生山谷。

茨胡味苦平。主治心腹肠胃中结气、饮食积聚、寒热邪气, 推陈致新,久服轻身、明目、益精。一名地薰。生川谷。

防葵味辛寒。主治疝瘕肠泄,膀胱热结溺不下,咳逆,温 疟,癫痫,惊邪狂走。久服坚骨髓,益气轻身。一名梨盖。生 川谷。 神农本草经 . 13.

著实味苦平。主治阴痿、益气,充肌肤,明目聪慧先知。 久服不饥、不老轻身。生川谷。

奄闾子味苦小温无毒。主治五脏瘀血,腹中水气,胪胀留 热,风寒湿痹,身体诸痛。久服轻身延年不老。生川谷。

薏苡人味甘微寒。主治筋急拘挛不可屈伸,风湿痹,下气。 久服轻身益气。其根下三虫。一名解蠡。生平泽。

车前子味甘寒无毒。主治气癃,止痛、利水道小便,除湿痹。久服轻身耐老。一名当通。生平泽。

析蓂子味辛酸温无毒。主明目,目痛泪出,除痹补五脏, 益精光。久服轻身不老。一名蔑析,一名大蕺,一名马辛。生 山泽。

充蔚子味辛微温。主明目益惊,除水气。久服轻身。茎, 主瘾疹痒,可作汤浴。一名益母,一名益明,一名大札。生池 泽。

木香味辛温。主治邪气,辟毒疫温鬼,强志,主淋露。久服不梦寤魇寐。生山谷。龙胆味苦涩。主治骨间寒热,惊痫邪气,续绝伤,定五脏,杀蛊毒。久服益智不忘,轻身耐老。一名陵游。生山谷。

菟丝子味辛平。主续绝伤,补不足,益气力,肥健。汁, 去面鼾。久服明目轻身延年。一名菟芦。生山谷。 神农本草经 · 14 ·

巴戟天味辛微温。主治大风邪气,阴痿不起。强筋骨,安 五脏,补中,增志,益气。生山谷。

白莫味甘寒。主治寒热、八疸、消渴。补中益气。久服轻身延年。一名穀菜。

白蒿味甘平。主治五脏邪气,风寒湿痹,补中益气,长毛发令黑,疗心悬,少食常饥。久服轻身,耳目聪明,不老。生川泽。

地肤子味苦寒。主治膀胱热,利小便,补中益精气。久服 耳目聪明,轻身耐老。一名地葵。生平泽。石龙芻味苦微寒。 主治心腹邪气,小便不利,淋闭。风湿鬼注恶毒。久服补虚羸, 轻身,耳目聪明,延年。一名龙须,一名草续断。生山谷。

落石味苦温.主治风热死肌,痈伤,口干舌焦,痈肿不消,喉舌肿,水浆不下。久服轻身明目,润泽好颜色,不老延年。一名石鲮,生川谷。

黄连味苦无毒。主治热气,目痛眦伤泣出,明目,肠澼腹痛下利,妇人阴中肿痛。久服令人不忘。一名王连,生川谷。 (亦贴生于树木或墙壁上)

王不留行味苦平。主治金创,止血、逐痛,出刺,除风痹内寒。久服轻身耐老增寿。生山谷。蓝实味苦寒。主解诸毒,杀虫蚑注鬼螫毒。久服头不白,轻身。生平泽。( 靛花,即青黛)

景天味苦酸平。主大热火疮,身热烦,邪恶气。华,主女人漏下赤白,轻身明目。一名戒火,一名慎火。生川谷。

天名精味甘寒。主治瘀血血瘕欲死,下血,止血,利小便,除小虫,去痹,除胸中结热,止烦渴。久服轻身耐老。一名麦句姜,一名虾蟆蓝,一名豕首。生川泽。(又名地菘,子名鹤虱,根名吐牛膝)

蒲黄味甘平,主治心腹膀胱寒热,利小便,止血,消瘀血。 久服轻身,益气力,延年神仙。生池泽。

香蒲味甘平,主治五脏心下邪气,口中烂臭,坚齿、明目、 聪耳。久服轻身耐劳。一名。生池泽。

兰草味辛平。主利水道,杀蛊毒,辟不祥。久服益气、轻身、不老,通神明。一名水香。生池泽。

决明子味咸平。主治青芒,目淫肤赤白膜,眼赤痛泪出。 久服益精光轻身。生川泽。

云实味辛小温。主治泄利肠澼,杀虫蛊毒,去邪恶结气, 止痛,除寒热。华,主治见鬼精物。多食令人狂走。久服轻身, 通神明。生川谷。(又名员实、天豆、云英)

黄芪味甘微温。主治痈疽久败疮,排脓止痛,大风癞疾, 五痔鼠瘘,补虚,小儿百病。一名戴糁。生山谷。 蛇床子味苦平。主治妇人阴中肿痛,男子阴漏,湿痒,除痹气,利关节,癫痫恶疮。久服轻身。一名蛇粟,一名蛇米。 生川谷。

漏芦味苦咸寒。主治皮肤热,恶疮疽痔,湿痹,下乳汁。 久服轻身益气,耳目聪明,不老延年。一名野兰。生山谷。

茜根味苦寒。主治寒湿风痹,黄疸。补中。生山谷。

旋华味甘温。主益气,去面鼾黑色,媚好。根,主腹中寒 热邪气,利小便。久服不饥轻身。一名筋根华,一名金沸。生 平泽。

白兔藿味苦平。主治蛇虺蜂虿猘狗菜肉蛊毒,鬼注。一名白葛。生山谷。

青蘘味甘寒。主治五臟邪气,风寒湿痹,益气,补脑髓, 坚筋骨。久服耳目聪明,不饥、不老、增寿。巨胜苗也。(即 胡麻之苗)生川谷。

当归味甘温无毒。主治欬逆上气,温疟热洗洗在皮肤中,妇人漏下绝子诸恶疮疡,金创,主饮之。一名乾归。生川谷。

神农本草经 . 17.

#### 草部中品

赤箭味辛温。主杀鬼精物,蛊毒恶气。久服益气力,长阴,肥健,轻身增年。一名离母,一名鬼督邮。生川谷。

麦门冬味甘平。主治心腹结气,伤中伤饱,胃络脉绝,羸 瘦短气。久服轻身、不老、不饥。生川谷。

卷柏味辛平。主治五脏邪气,女子阴中寒热痛,癥瘕,血闭,绝子。久服轻身、和颜色。一名万岁。生山谷。

肉松容味咸。主治五劳七伤,补中,除茎中寒热痛,养五脏,强阴,益精气,多子,妇人癥瘕。久服轻身。生山谷。

蒺藜子味苦温。主治恶血,破癥结积聚喉痹,乳难。久服长肌肉,明目轻身。一名旁通,一名屈人,一名止行,一名豺羽,一名升推。生平泽。

防风味甘温无毒。主治大风眩痛,恶风风邪,目盲无所见, 风行周身,骨节疼痛,烦满。久服轻身。一名铜芸。生川泽。

沙参味苦微寒无毒。主治血积惊气,除寒热,补中益肺气。 久服利人。一名知母。生川谷。 芎穷味辛温无毒。主治中风入脑头痛,寒痹筋挛缓急,金创,妇人血闭无子。生川谷。

糜芜味辛温。主治欬逆,定惊气,辟邪恶,除蛊毒鬼注, 去三虫。久服通神。一名薇芜。

续断味苦微温。主治伤寒,补不足,金创痈伤折跌,续筋骨,妇人乳难。久服益气力。一名龙豆,一名属折。生山谷。

茵陈蒿味苦无毒。主治风湿寒热邪气,热结黄疸。久服轻身、益气、耐老。生太山及丘陵坡岸上。

五味味酸温。主益气、咳逆上气,劳伤羸瘦,补不足,强阴,益男子精。生山谷。

秦艽味苦平。主治寒热邪气,寒湿风痹肢节痛,下水利小便。生山谷。

黄芩味苦平。主治诸热黄疸,肠澼泄利,逐水,下血闭, 恶疮疽蚀,火疡。一名腐肠。生川谷。勺药味苦。主治邪气腹 痛,除血痹,破坚积寒热疝瘕,止痛,利小便,益气。生川谷。

干姜味辛温。主治胸满咳逆上气,温中、止血,出汗,逐 风湿痹,肠澼下利,生者尤良。久服去臭气,通神明。生川谷。

蒿本味辛微温。主治妇人疝瘕,阴中寒肿痛,腹中急,除 风头痛,长肌肤,悦颜色。一名鬼卿,一名地新。生山谷。 神农本草经 . 19.

麻黄味苦温无毒。主治中风伤寒头痛,温疟,发表出汗,去邪热气,止欬逆上气,除寒热,破癥坚积聚。一名龙沙。生山谷。

葛根味甘平。主治消渴,身大热,呕吐,诸痹,起阴气,解诸毒。葛谷,主下利十岁以上。一名鸡齐根。生川谷。知母味苦寒无毒。主治消渴热中,除邪气,肢体浮肿,下水,补不足,益气。一名母蚳、连母、野蓼、地参、水参、水浚、货母。生川谷。

贝母味辛平。主治伤寒烦热,淋沥、邪气、疝瘕,喉痹, 乳难。金疮风痉。一名空草。

栝楼味苦寒。主治消渴,身热烦满,大热。补虚安中,续 绝伤。一名地楼。生川谷及山阴。

丹参味苦微寒无毒。主治心腹邪气,肠鸣幽幽如走水,寒 热积聚,破癥除瘕,止烦满,益气。一名却蝉草。生山谷。

玄参味苦微寒无毒。主治腹中寒热积聚,女子产乳余疾。 补肾气,令人目明。一名重台。生川谷。苦参味苦寒。主治心腹结气,疝瘕积聚,黄疸,溺有余沥,逐水,除痈肿。补中,明目止泪。一名水槐,一名苦識。生山谷及田野。

狗脊味苦平。主腰背强,关机缓急,周痹,寒湿膝痛。颇 利老人。一名百枝。生川谷。 神农本草经 . 20 .

萆薢味苦平。主治腰背痛强,骨节风寒湿周痹。恶疮不瘳, 热气。生山谷。

通草味辛平。主去恶虫,除脾胃寒热,通利九窍血脉关节,令人不忘。一名附支。生山谷。

瞿麦味苦寒。主治关格诸癃结,小便不通,出刺,决痈肿,明目去翳,破胎堕子,下闭血。一名巨句麦。生川谷。

败酱味苦平。主治暴热火疮,赤气,疥瘙疽痔,马鞍,热 气。一名鹿肠。生川谷。

白芷味辛温。主治女人漏下赤白,血闭,阴肿,寒热,风 头,侵目泪出,长肌肤、润泽,可作面脂。一名芳香。生川谷。

杜若味辛微温。主治胸胁下逆气,温中,风入脑户,头肿痛,多涕泪出。久服益精、明目、轻身。一名杜蘅。生川泽。

紫草味苦寒。主心腹邪气、五疸,补中益气,利九窍,通水道。一名紫丹,一名紫芙,一名地血。生山谷。

紫菀味苦温。主治咳逆上气,胸中寒热结气,去蛊毒痿蟨, 安五脏。生山谷。

白鲜味苦寒。主治头风,黄疸,咳逆,淋沥,女子阴中肿痛,湿痹死肌,不可屈伸,起止行步。生川谷。

神农本草经 . 21.

薇衔味苦平。主治风湿痹,历节痛,惊痫吐舌,悸气贼风, 鼠瘘痈肿。一名麋衔。生川泽。

白薇味苦平。主治暴中风身热,肢满,忽忽不知人,狂惑 邪气,寒热酸疼,温疟洗洗,发作有时。生川泽。

葉耳实味甘温。主治风头寒痛,风湿周痹,四肢拘挛痛,恶肉死肌。久服益气,耳目聪明,强志轻身。一名胡葈,一名地葵。生川谷。

茅根味甘寒。主治劳伤虚羸,补中益气,除瘀血,血闭寒 热,利小便。其苗主下水。一名兰根,一名茹根。生山谷。

酸酱味酸平。主治热烦满,定志益气,利水道,产难,吞 其实立产。一名酢酱。生川泽。淫羊藿味辛寒。主治阴痿,绝 伤,茎中痛,利小便。益气力,强志。一名刚前。生山谷。

蠡实味甘平。主治皮肤寒热,胃中热气,风寒湿痹。坚筋骨,令人嗜食。久服轻身。华叶,去白虫。一名剧草,一名三坚,一名豕首。生川谷。

款冬味辛温。主治咳逆上气,善喘,喉痹,诸惊痫,寒热 邪气。一名橐吾、颗东、虎虚、菟奚。生山谷。

防己味辛平。主治风寒温疟热气,诸痫,除邪利大小便。 一名解离。生川谷。 神农本草经 · 22 ·

女菀味辛温。主治风寒洗洗,霍乱泄痢,肠鸣上下无常处, 惊痫寒热百疾。生川谷。

泽兰味酸无毒。主治乳妇衄血,中风余疾,大腹水肿,身面四支浮肿,骨节中水,金创,痈肿疮脓。一名虎兰,一名龙枣。生泽傍。

地榆味苦微寒。主治妇人乳痛,七伤,带下病,止痛,除恶肉,止汗,疗金创。生山谷。

王孙味苦平无毒。主治五脏邪气,寒湿痹,四肢疼酸,膝 冷痛。生川谷。

爵床味咸寒。主治腰脊痛不得著床,俯仰艰难,除热,可 作浴汤。生山谷。

马先蒿味苦平。主治寒热鬼注,中风湿痹,女子带下病, 无子。一名马矢蒿。生川泽。

蜀羊泉味苦微寒。主治头秃恶疮,热气疥瘙痂癣虫,疗龋齿。生川谷。

积雪草味苦寒,主治大热,恶疮痈疽,浸淫赤熛,皮肤赤,身热。生川谷。垣衣味酸无毒。主治黄疸,心烦咳逆,血气,暴热在肠胃,金创内寒。久服补中益气,长肌,好颜色。一名昔邪,一名乌韭,一名垣嬴,一名天韭,一名鼠韭。生古垣墙阴或屋上。

神农本草经 · 23 ·

水萍味辛寒。主治暴热身痒,下水气,胜酒,长须发,止 消渴。久服轻身。一名水华。生池泽。

海藻味苦寒。主治癭瘤气,颈下核,破散结气,痈肿,癥 瘕坚气,腹中上下鸣,下十二水肿。一名落首。生池泽。

桔梗味苦无毒。主治胸胁痛如刀刺,腹满肠鸣幽幽,惊恐悸气。生山谷。

旋覆花味咸温。主治结气,胁下满,惊悸,除水,去五脏间寒热。补中下气。一名金沸草,一名盛湛。生川谷。

蛇全味苦微寒。主治惊痫寒热邪气,除热,金创,疽痔鼠 瘘,恶疮头疡。一名蛇衔。生山谷。

假苏味辛温。主治寒热鼠瘘瘰疬生疮,破结聚气,下瘀血,除湿痹。一名鼠蓂。生川泽。

#### 草部下品

营实味酸温。主治痈疽恶疮,结肉跌筋,败疮热气,阴蚀 不瘳,利关节。一名墙薇,一名墙麻,一名牛棘。生山谷。

牡丹味辛寒。主治寒热中风,瘈疭痉,惊痫邪气,除癥坚, 瘀血,留舍肠胃,安五脏,疗痈疮。一名鹿韭,一名鼠姑。生 山谷。

石韦味苦平。主治劳热邪气,五癃闭不通,利小便水道。 一名石樜。生山谷石上。

百合味甘平。主治邪气腹胀心痛,利大小便。补中益气。 生川谷。

紫参味苦寒。主治心腹积聚,寒热邪气,通九窍,利大小便。一名牡蒙。生山谷。

王瓜味苦寒。主治消渴内痹,瘀血月闭,寒热酸疼,益气愈聋。一名土瓜。生平泽。

大黄味苦寒有毒。主下瘀血,血闭,寒热,破癥瘕积聚, 留饮宿食,荡涤肠胃,推陈致新,通利水谷,调中化食,安和 五脏。生山谷。 神农本草经 . 25.

甘遂味苦寒有毒。主治大腹疝瘕,腹满,面目浮肿,留饮宿食,破癥坚积聚,利水谷道。一名主田。生川谷。

亭历味辛寒。主治癥瘕积聚结气,饮食寒热,破坚逐邪,通利水道。一名大室,一名大适。生平泽及田野。芫华味苦温有毒。主治欬逆上气,喉鸣喘,咽肿气短,蛊毒鬼疟,疝瘕痈肿,杀虫鱼。一名去水。生川谷。

泽漆味苦微寒。主治皮肤热,大腹水气,四肢面目浮肿, 丈夫阴气不足。生川泽。

大戟味苦寒。主治蛊毒十二水。腹满急痛,积聚,中风, 皮肤疼痛,吐逆。一名卯钜。

荛华味苦寒。主治伤寒温疟,下十二水,破积聚大坚癥瘕, 荡涤肠胃中留癖饮食,寒热邪气,利水道。生川谷。

钩吻味辛温。主治金疮乳,中恶风,咳逆上气,水肿,杀鬼注蛊毒。一名治葛。生山谷。

藜芦味辛寒有毒。主治蛊毒,咳逆,泄痢肠澼,头疡疥瘙 恶疮,杀诸虫毒,去死肌。一名黄苒。生山谷。

乌头味辛温有毒。主治中风恶风洗洗,出汗,除寒湿痹,咳逆上气,破积聚寒热。其汁煎之,名射罔,杀禽兽。一名奚毒,一名即子,一名乌喙。生山谷。

神农本草经 . 26.

天雄味辛温。主治大风,寒湿痹,历节痛,拘挛缓急,破积聚,邪气,金创,强筋骨,轻身健行。一名白幕。生山谷。

附子味辛温有毒。主治风寒咳逆邪气,温中,金创,破癥 堅积聚,血瘕寒湿,踒躄拘挛,膝痛不能行走。生山谷。

羊踯躅味辛温有毒。主治贼风在皮肤中淫淫痛,温疟,恶毒,诸痹。生川谷。茵芋味苦温。主治五脏邪气,心腹寒热羸瘦,如疟状发作有时,诸关节风湿痹痛。生川谷。

射干味苦平。主治咳逆上气,喉痹咽痛不得消息,散结气,腹中邪逆,食饮大热。一名乌扇,一名乌蒲。生川谷。

鸢尾味苦平。主治蛊毒邪气,鬼注诸毒,破癥瘕积聚,去水,下三虫。生山谷。

贯众味苦微寒有毒。主治腹中邪熱氣,诸毒,杀三虫。一 名贯节,一名贯渠,一名百头,一名虎卷,一名扁苻。生山谷。

飞廉味苦平。主治骨节热,胫重酸疼。久服令人身轻。一 名飞轻。生川泽。

半夏味辛平。主治伤寒寒热,心下坚,下气,喉咽肿痛, 头眩胸胀,咳逆肠鸣,止汗。一名地文,一名水玉。生川谷。 虎掌味苦温无毒。主治心痛,寒热,结气,积聚伏梁,伤筋痿 拘缓,利水道。生山谷。 莨荡子味苦寒。主治齿痛,出虫,肉痹拘急,使人健行,见鬼,多食令人狂走。久服轻身。走及奔马,强志、益力、通神。一名横唐。生川谷。

蜀漆味辛平有毒。主治疟及咳逆寒热,腹中癥坚痞结,结 聚邪气,蛊毒鬼注。生川谷。

恒山味苦寒。主治伤寒寒热,热发温疟,鬼毒,胸中痰结, 吐逆。一名互草。生川谷。

青葙味苦微寒。主治邪气,皮肤中热,风瘙身痒,杀三虫。 子名草决明,疗唇口青。一名草蒿,一鸣蒌蒿。生平谷。狼牙 味苦寒有毒。主治邪气热气,疥瘙恶疡疮痔,去白虫。一名牙 子。生川谷。

白蔹味苦平。主治痈肿疽疮,散结气,止痛除热,目中赤,小儿惊痫,温疟,女子阴中肿痛。一名菟核,一名白草。生山谷。

白及味苦平。主治痈肿恶疮败疽,伤阴,死肌,胃中邪气, 贼风鬼击,痱缓不收。一名甘根,一名连及草。生川谷。

草蒿味苦寒。主治疥瘙痂痒恶疮,杀虱,留热在骨节间,明目。一名青蒿,一名方溃。生川泽。

權菌味咸平。主治心痛,温中,去长虫、白徙、蛲虫,蛇 螫毒,癥瘕诸虫。一名雚芦。生池泽。连翘味苦平。主治寒热 神农本草经 . 28 .

鼠漏,瘰疬痈肿,恶疮瘿瘤,结热蛊毒。一名异翘,一名蕳华, 一名折根,一名三廉。生山谷。

白头公味苦温无毒。主治温疟狂易,寒热,癥瘕积聚,瘿 气,逐血止痛,疗金创。一名野丈人,一名胡王使者。生川谷。

闾茹味酸咸有毒。主蚀恶肉,败疮,死肌,杀疥虫,排脓恶血,除大风热气,善忘不乐。生川谷。

羊桃味苦寒。主治熛热身暴赤色,风水积聚,恶疡,除小儿热。一名鬼桃,一名羊肠。生川谷。

羊蹄味苦寒。主治头秃疥瘙,除热,女子阴蚀。一名东方宿,一名连虫陆,一名鬼目。生川泽。

鹿藿味苦平。主治蛊毒,女子腰腹痛不乐,肠痈瘰疬疡气。 生山谷。牛扁味苦微寒。主治身皮疮热气,可作浴汤,杀牛虱 小虫,又疗牛病。生川谷。

陆英味苦寒。主治骨间诸痹,四肢拘挛疼酸,膝寒痛,阴 痿,短气不足,脚肿。生川谷。

蓋草味苦平。主治久咳上气,喘逆久寒,惊悸,痂疥,白 秃,疡气,杀皮肤小虫。生川谷。

夏枯草味苦辛寒。主治寒热瘰疬,鼠瘘头疮,破癥,散瘿结气,脚肿湿痹。轻身。一名夕句,一名乃东。生川谷。

神农本草经 . 29 .

乌韭味甘寒。主治皮肤往来寒热,利小肠、膀胱气。生山谷。

蚤休味苦微寒。主治惊痫摇头弄舌,热气在腹中,癫疾,痈疮阴蚀,下三虫,去蛇毒。一名螫休。生川谷。

石长生味咸微寒。主治寒热恶疮大热,辟鬼气不祥。一名 丹草。生山谷。

狼毒味辛平。主治咳逆上气,破积聚饮食,寒热水气,恶疮鼠瘘疽蚀,鬼精蛊毒,杀飞鸟走兽。一名续毒。生山谷。

鬼臼味辛温。主杀蛊毒鬼注精物,辟恶气不祥,逐邪解百毒。一名爵犀,一名马目毒公,一名九臼。生山谷。

扁蓄味苦平。主治浸淫疥瘙疽痔,杀三虫。生山谷。

商陆味辛平。主治水胀,疝瘕痹,熨除痈肿。杀鬼精物。 一名根,一名夜呼。生川谷。

女青味辛平。主治蛊毒,逐邪恶气,杀鬼温疟,辟不祥。 一名雀瓢。生山谷。白附子主治心痛血痹,面上百病,行药势。 生蜀郡。

姑活味甘温。主治大风邪气,湿痹寒痛。九服轻身益寿耐 老。一名冬葵子。生川泽。 <u>神农本草经</u> · 30 ·

别羁味苦微温。主治风寒湿痹,身重,四肢疼酸寒邪历节痛。生川谷。

石下长卿味咸平。主治鬼注精物,邪恶气,杀百精蛊毒, 老魅注易,亡走啼哭,悲伤恍惚。一名徐长卿。生池泽。

翘根味苦寒。主治下热气,益阴精,令人面悦好,明目。 久服轻身耐老。生平泽。

屈草味苦。主治胸胁下痛,邪气,肠间寒热,阴痹。久服 轻身益气耐老。生川泽。 神农本草经 . 31.

#### 木部上品

茯苓味甘平。主治胸胁逆气,忧恚惊恐,心下结痛,寒热烦满咳逆,口焦舌干,利小便。久服安魂养神,不饥延年。一 名伏兔。生山谷。

松脂味苦温。主治痈疽恶疮,头疡白秃,疥瘙风气,安五脏,除热。久服轻身延年。一名松膏,一名松肪。生山谷。

柏实味甘平。主治惊悸,安五脏,益气,除风湿痹。久服令人润泽美色,耳目聪明,不饥不老,轻身延年。生山谷。

菌桂味辛温。主治百病,养精神,和颜色,为诸药先娉通使。久服輕身不老,面生光华,媚好常如童子。生交止山谷。

牡桂味辛温。主治上气咳逆、结气,喉痹吐吸,利关节,补中益气。久服通神,轻身不老。生山谷。

杜仲味辛平。主治腰膝痛,补中,益精气,坚筋骨,强志,除阴下痒湿,小便余沥。久服轻身耐老。一名思仙。生山谷。

蔓荆实味苦微寒。主治筋骨间寒热,湿痹拘挛,明目坚齿, 利九窍,去白虫。久服轻身耐老。小荆实亦等。 女贞实味苦平。主补中安五脏,养精神,除百疾。久服肥健、轻身、不老。生川谷。

桑上寄生味苦平。主治腰痛,小儿背强,痈肿,安胎,充肌肤,坚齿发,长须眉。其实,明目、轻身、通神。一名寄屑,一名寓木,一名宛童。生山谷。

苏核味甘平无毒。主治心腹邪结气,明目,目赤痛伤泪出。 久服轻身、益气、不饥。生川谷。

葉木味苦寒。主治五脏肠胃中结气热,黄疸,肠痔,止泄利,女子漏下赤白,阴阳蚀疮。根,一名檀桓。生山谷。

辛夷味辛溫。主治五臟身体寒热,风头脑痛,面鼾。久服下气,轻身明目,增年能老。一名辛引,一名侯桃,一名房木。 生川谷。

榆皮味甘平。主治大小便不通,利水道,除邪气。久服轻身不饥。其实尤良。一名零榆。生山谷。

酸枣味酸平。主治心腹寒热邪结气,四肢酸疼,湿痹。久 服安五脏,轻身延年。生川泽。

槐子味苦寒。主治五内邪气热,止涎唾,补绝伤,五痔火疮,妇人乳瘕,子藏急痛。生平泽。

枸杞味苦寒。主治五内邪气,热中消渴,周痹。久服坚筋

神农本草经 . 33 .

骨,轻身耐老。一名杞根,一名地骨,一名枸忌,一名地辅。 生平泽。

橘柚味辛温。主治胸中瘕热逆气,利水谷。久服去口臭, 下气通神。一名橘皮。生南山川谷。 神农本草经 . 34.

#### 木部中品

干漆味辛温,无毒。主治绝伤,补中,续筋骨,填髓脑,安五脏,五缓六急,风寒湿痹。生漆,去长虫。久服轻身耐老。生川谷。

木兰味苦寒。主治身大热在皮肤中,去面热赤疱酒皶,恶 风癩疾,阴下痒湿,明目。一名林兰。生山谷。

龙眼味甘平。主治五脏邪气,安志,厌食。久服强魂,聪明,轻身不老,通神明。生山谷。

厚朴味苦温无毒。主治中风、伤寒、头痛,寒热惊气,血痹死肌,去三虫。生山谷。

竹叶味苦平。主治咳逆上气,溢筋急恶疡,杀小虫。根,作汤,益气止渴,补虚下气。汁,主风痉痹。实,通神明,轻身益气。

枳实味苦寒。主治大风在皮肤中如麻豆苦痒,除寒热热结, 止利。长肌肉,利五脏,益气轻身。生川泽。

山茱萸味酸无毒。主治心下邪气寒热,温中,逐寒湿痹, 去三虫。久服轻身。一名蜀枣。生山谷。 吴茱萸味辛温。主温中下气止痛,咳逆寒热,除湿血痹,逐风邪,开腠理。根,杀三虫。一名藙。生川谷。秦皮味酸无毒。主治风寒湿痹,洗洗寒气,除热,目中青翳白膜。久服头不白,轻身。生川谷。

支子味苦寒。主治五内邪气,胃中热气,面赤酒疱皶鼻, 白癞赤癞疮疡。一名木丹。生川谷。

合欢味甘平。主安五脏,和心志,令人欢乐无忧。久服轻身明目,得所欲。生益州山谷。

秦椒味辛温。主治风邪气,温中,除寒痹,坚齿长发,明目。久服轻身好颜色,耐老增年通神。生川谷。

紫葳味酸微寒。主治妇人乳余疾,崩中癥瘕血闭,寒热羸瘦,养胎。生川谷。

芜荑味辛。主治五内邪气,散皮肤骨节中淫淫行毒。去三虫,化食。一名无姑,一名殿塘(草头)。生川谷。

桑根白皮味甘寒。主治伤中五劳六极羸瘦,崩中脉绝,补虚益气。叶,除寒热,出汗。桑耳,黑者,主女子漏下,赤白汁,血病,癥瘕积聚腹痛,阴阳寒热,无子。五木耳,名薷榜,益气不饥,轻身强志。

#### 木部下品

松萝味苦平。主治瞋怒邪气,止虚汗出,风头,女子阴寒肿痛。一名女萝。生山谷。

五加味辛温。主治心腹疝气,腹痛,益气,疗躄。小儿立能行,疽疮阴蚀。一名豺漆。

猪苓味甘平。主治痎疟,解毒,蛊毒、蛊注,不祥,利水道。久服轻身耐老。一名叚(犬旁)猪矢。生山谷。

白棘味辛寒。主治心腹痛,痈肿溃脓止痛。一名棘鍼。生 川谷。

卫矛味苦寒无毒。主治女子崩中下血,腹满汗出,除邪, 杀鬼毒蛊注。一名鬼箭。

黄环味苦有毒。主治蛊毒鬼注鬼魅,邪气在藏中,除咳逆寒热。一名陵泉,一名大就。生山谷。

石南草味辛平。主养肾气,内伤阴衰,利筋骨皮毛。实, 杀蛊毒,破积聚,逐风痹。一名鬼目。生山谷。

巴豆味辛温有毒。主治伤寒温疟寒热,破癥瘕结聚坚积,

留饮痰癖,大腹水脹,蕩滌五臟六腑,开通闭塞,利水谷道, 去恶肉,除鬼毒蛊注邪物,杀虫鱼。一名巴椒。生川谷。

蜀椒味辛温。主治邪气咳逆,温中,逐骨节皮肤死肌,寒湿痹痛,下气。久服之头不白,轻身增年。生川谷。

莽草味辛温。主治风头,痈肿乳痈,疝瘕,除结气,疥瘙疽疮。杀虫鱼。生山谷。

郁核味酸平。主治大腹水肿,面目四肢浮肿,利小便水道。根,主治齿断肿、龋齿,坚齿。鼠李,主治寒热瘰疬疮。一名爵李。生川谷。

栾华味苦寒。主治目痛泪出伤眦,消目肿。生川谷。

蔓椒味苦温。主治风寒湿痹,历节痛,除四肢厥气,膝痛。 一名豕椒。生川谷。

雷丸味苦寒。主杀三虫,逐毒气,胃中热,利丈夫,不利女子。作摩膏,除小儿百病。生山谷。

溲疏味辛寒。主治身皮肤中热,除邪气,止遗溺,可作浴汤。生川谷。药食根味辛温。主治邪气,诸痹疼酸,续绝伤,补骨髓。一名连木。(即贝母之根)生山谷。

皂荚味辛咸温。主治风痹死肌,邪气,风头泪出。利九窍, 杀精物。生川谷。 神农本草经 . 38.

练实味苦寒。主治温疾伤寒大热烦狂,杀三虫,疥疡,利 小便水道。(即楝实)生山谷。

柳华味苦寒。主治风水,黄疸,面热黑。叶,主治马疥痂疮。实,主治溃痈,逐脓血。一名柳絮。生瑯邪川泽。

桐叶味苦寒。主治恶蚀疮著阴。皮,主五痔,杀三虫。华, 傅猪疮,饲猪肥大三倍。生山谷。

梓白皮味苦寒。主治热,去三虫。华叶,捣傅猪疮,饲猪肥大三倍。生山谷。

淮木味苦平无毒。主治久咳上气,伤中虚羸,女子阴蚀,漏下赤白卧。一名百岁城中木。生平泽。

神农本草经 . 39 .

# 下卷

#### 虫兽部上品

发髲味苦温。主治五癃关格不通,利小便水道,疗小儿痫, 大人痓,仍自还神化。

龙骨味甘平。主治心腹鬼注,精物老魅,咳逆,泄利脓血, 女子漏下,癥瘕坚结,小儿热气惊痫。齿,主治小儿大人惊痫 癫疾狂走,心下结气,不能喘息,诸痉。杀精物。久服轻身通 神明延年。生山谷。

牛黄味苦平。主治惊痫寒热,热甚狂痓,除邪逐鬼。牛角 鰓,下闭血,瘀血疼痛,女子带下血。髓,补中填骨髓,久服 增年。胆,可丸药。生平泽。麝香味辛温。主辟恶气,杀鬼精 物,温疟,蛊毒痫痓,去三虫。久服除邪不梦寤魇寐。生川谷。

熊脂味甘微寒。主治风痹不仁筋急,五藏腹中积聚,寒热羸瘦,头疡百秃,面鼾疱。久服强志不饥轻身。生山谷。

白胶味甘平。主治伤中劳绝,腰痛羸瘦,补中益气,妇人 血闭无子,止痛安胎。久服轻身延年。一名鹿角胶。 阿胶味甘平。主治心腹内崩,劳极洒洒如疟状,腰腹痛, 四肢酸疼,女子下血,安胎。久服轻身益气。一名传致胶。

丹雄鸡味甘微温。主治女子崩中漏下,赤白沃,补虚,温中,止血通神,杀毒,辟不祥。头,主杀鬼。肪,主治耳聋。肠,主治遗溺。肶胵裹黄皮,主治泄利。屎白,主治消渴,伤寒寒热。翮羽,主下血闭。鸡子,除热火疮,痫痓,可作虎魄神物。鸡白蠹,肥猪。生平泽。

雁肪味甘平无毒。主治风挛拘急,偏枯,气不通利。久服 益气不饥,轻身耐老。一名鹜肪。生池泽。

石蜜味甘平。主治心腹邪气,诸惊痫痓,安五藏诸不足, 益气补中,止痛解毒,除众病,和百药。久服强志轻身,不饥 不老。生山谷。

蜜蜡味甘微温。主治下利脓血,补中,续绝伤,金创,益气,不饥耐老。生山谷。

蜂子味甘平。主治风头,除蛊毒,补虚羸,伤中。久服令人光泽,好颜色,不老。大黄蜂子,主治心腹胀满痛,轻身益气。土蜂子,主治痈肿。一名蜚零。生山谷。

牡蛎味咸平。主治伤寒寒热,温疟洒洒,惊恚怒气,除拘缓,鼠瘘,女子带下赤白。久服强骨节,杀邪鬼,延年。一名 蛎蛤。生池泽。 神农本草经 . 41.

鲤鱼胆味苦寒。主治目热赤痛,青盲,明目。久服强悍益 志气。生池泽。

鳢鱼味甘寒。主治湿痹面目浮肿,下大水。一名酮鱼。生 池泽。

## 虫兽部中品

犀角味苦寒。主治百毒蛊注,邪鬼瘴气,杀钩吻鸠羽蛇毒,除邪,不迷惑魇寐。久服轻身。生川谷。

羚羊角味咸寒。主明目益气起阴,去恶血注下,辟蛊毒恶鬼不祥,安心气,常不魇寐。久服强筋骨轻身。生川谷。羖羊角味咸温。主治青盲、明目,杀疥虫,止寒泄,辟恶鬼虎狼,止惊悸。久服安心益气轻身。生川谷。

白马茎味咸平。主治伤中脉绝,阴不起。强志益气,长肌肉,肥健生子。眼,主治惊痫腹满疟疾。悬蹄,主治惊邪瘈疭,乳难,辟恶气鬼毒蛊注不祥。生平泽。

狗阴茎味咸平。主治伤中,阴痿不起,令强热大生子,除 女子带下十二疾。胆,明目。一名狗精。生平泽。

鹿茸味甘温。主治漏下恶血,寒热惊痫,益气强志,生齿不老。角,主治恶疮痈肿,逐邪恶气,留血在阴中。伏翼味咸平。主治目暝,明目,夜视有精光。久服令人喜乐媚好无忧。一名蝙蝠。生太山川谷。

猬皮味苦平。主治五痔阴蚀,下血赤白,五色血汁不止,阴肿痛引腰背。酒煮杀之。生川谷。

石龙子味咸寒。主治五癃,邪结气,破石淋,下血,利小便水道。一名蜥蜴。生川谷。

桑螵蛸味咸平。主治伤中,疝瘕阴痿,益精生子,女子血闭腰痛,通五淋,利小便水道。生桑枝上,采蒸之。一名蚀肬。

蚱蝉味咸寒。主治小儿惊痫,夜啼,癫病,寒热。生杨柳上。

白僵蚕味咸。主治小儿惊痫夜啼,去三虫,灭黑鼾,令人 面色好,男子阴疡病。生平泽。

木虻味苦平。主治目赤痛,皆伤泪出,瘀血血闭,寒热酸斯,无子。一名魂常。生川泽。

蜚虻味苦微寒。主逐瘀血,破下血积坚癖癥瘕寒热,通利 血脉及九窍。生川谷。

蜚廉味咸。主治血瘀,癥坚寒热,破积聚,喉咽痹,内寒 无子。生川泽。

蛴螬味咸微温。主治恶血血瘀,痹,破折血在胁下坚满痛,月闭,目中淫肤,青翳白膜。一名愤螃蛴。生平泽。

蛞蝓味咸寒。主治贼风喎僻,轶筋及脱肛,惊痫挛缩。一 名陵蠡。生池泽。 海蛤味苦平。主治咳逆上气,喘息烦满,胸痛寒热。一名魁蛤。生池泽。文蛤,主治恶疮,蚀五痔。

龟甲味咸平。主治漏下赤白,破癥瘕,痎疟,五痔阴蚀,湿痹,四肢重弱,小儿囟不合。久服轻身不饥。一名神屋。生 池泽。

鳖甲味咸平。主治心腹癥瘕,坚积寒热,去痞、息肉,阴 蚀,痔,恶肉。生池泽。

鮀鱼甲味辛微温。主治心腹癥瘕,伏坚积聚,寒热,女子崩中下血五色,小腹阴中相引痛,疥疮死肌。生池泽。

乌贼鱼骨味咸微温。主治女子漏下赤白经汁,血闭,阴蚀肿痛,寒热,癥瘕,无子。生池泽。

蟹味咸寒。主治胸中邪气,热结痛,喎僻面肿。败漆。烧之致鼠。生池泽。

虾蟇味辛寒。主治邪气,破癥坚血,痈肿阴疮。服之不患 热病。生池泽。

## 虫兽部下品

六畜毛蹄甲味咸平。主治鬼注蛊毒,寒热,惊痫,癫痓狂走。骆驼毛尤良。

鼯鼠主堕胎,令易产。

糜脂味辛温。主治痈肿恶疮死饥,寒风湿痹,四肢拘缓不 收,风头肿气,通凑理。一名宫脂。生山谷。

豚卵味甘溫。主治惊癇癲疾,鬼注蛊毒,除寒热,賁豚, 五癃,邪气,挛缩。悬蹄,主治五痔,伏热在肠,肠痈内蚀。 一名豚颠。

鷰屎味心平。主治蛊毒,鬼注,逐不祥邪气,破五癃,利 小便。生高谷山平谷。

天鼠屎味辛寒。主治面目痈肿,皮肤洗洗时痛,腹中血气,破寒热积聚,除惊悸。一名鼠沽,一名石肝。生合浦山谷。露蜂房味苦平。主治惊痫瘈疭,寒热邪气,癫疾,鬼精蛊毒,肠痔。火熬之良。一名蜂场。生山谷。

樗鸡味苦平。主治心腹邪气,阴痿,益精强志,生子,好 色。补中轻身。生川谷。 蟅虫味咸寒。主治心腹寒热洗洗,血积癥瘕,破堅,下血闭,生子大良。一名地鳖。生川泽。

水蛭味咸平。主逐恶血瘀血月闭,破血瘕积聚,无子,利 水道。生池泽。

石蚕味酸无毒。主治五癃,破五淋,堕胎。肉,解结气, 利水道,除热。一名沙虱。生池泽。

蛇蜕味咸平。主治小儿百二十种惊痫,瘈疭,癫疾,寒热,肠痔,虫毒,蛇痫。火熬之良。一名龙子衣,一名蛇符,一名龙子单衣,一名弓皮。生山谷。吴公味辛温。主鬼注蛊毒,噉诸蛇虫鱼毒,杀鬼物老精,温疟,去三虫。生川谷。

马陆味辛温。主治腹中大坚蒸,破积聚,息肉恶疮,白秃。 一名百足。生川谷。

翳螉味辛平。主治久聋, 欬逆, 毒气, 出刺, 出汗。生川谷。

雀瓮味甘平。主治小儿惊痫,寒热结气,蛊毒,鬼注。一 名躁舍。

彼子味甘温。主治腹中邪气,去三虫,蛇螫,蛊毒,鬼注, 伏尸。

鼠妇味酸温。主治气癃不得小便,妇人月闭血瘕,痫痊寒

热,利水道。一名蟠贞,一名伊咸。生平谷。

萤火味辛微温。主明目,小儿火疮伤,热气,蛊毒鬼注, 通神精。一名夜光。生池泽。生池泽。

衣鱼味咸温无毒。主治妇人疝瘕,小便不利,小儿中风项强,皆宜摩之。一名白鱼。生平泽。

白颈蚯蚓味咸寒。主治蛇瘕,去三虫,伏尸,鬼注蛊毒, 杀长虫。仍自化作水。生平土。

蝼蛄味咸寒。主治产难,出肉中刺,溃痈肿,下哽噎,解毒,除恶疮。夜出者良。一名蟪蛄,一名天蝼,一名螜。生平泽。

蜣蜋味咸寒。主治小儿惊痫瘈疭,腹胀寒热,大人癫疾狂 易。火熬之良。一名吉螃蜣。生池泽。

盤蝥味辛寒。主治寒热鬼注蛊毒,鼠瘘,恶疮,疽蚀,死肌,破石癃。一名龙尾。生川谷。地胆味辛寒。主治鬼注寒热,鼠瘘恶疮,死积,破癥瘕,堕胎。一名元青。生川谷。

马刀味辛微寒有毒。主治漏下赤白,寒热,破石淋,杀禽兽贼鼠。生池泽。

贝子味咸平。主治目翳,鬼注,蛊毒,腹痛,下血,五癃, 利水道。烧用之良。生池泽。

## 果菜部上品

蒲陶味甘平。主治筋骨湿痹,益气倍力强志,令人肥健, 耐饥忍风寒。久食轻身不老延年。可作酒。生山谷。

蓬蔂味酸平。主安五藏,益精气,长阴令坚,强志倍力, 有子。久服轻身不老。一名覆盆。生平泽。

大枣味甘平。主治心腹邪气,安中养脾,助十二经,平胃气,通九窍,补少气少津液,身中不足,大惊,四肢重。和百药。久服轻身长年。叶覆麻黄,能令出汗。生平泽。藕实茎味甘平。主补中养神,益气力,除百疾。久服轻身耐老,不饥延年。一名水芝。生池泽。

鸡头味甘平。主治湿痹,腰脊膝痛,补中,除百疾,益精气,强志,耳目聪明。久服轻身不饥,耐老神仙。一名雁喙。 生池泽。

甘瓜子味甘平。主令人悦泽,好颜色,益气不饥。久服轻身耐老。瓜蒂,味苦寒。主治大水,身面四肢浮肿,下水,杀蛊毒,欬逆上气;食诸果不消,病在胸腹中,皆吐下之。一名土芝。生平泽。冬葵子味甘寒。主治五藏六腑寒热羸瘦,破五淋,利小便。久服坚骨长肌肉,轻身延年。

神农本草经 . 49.

苋实味甘寒。主治青盲明目,除邪,利大小便,去寒热。 久服益气力,不饥轻身。一名马苋。生川泽。

苦菜味苦寒。主治五藏邪气,厌穀胃痹。久服安心益气, 聪察少卧,轻身耐老。一名荼草,一名选。生川谷。 神农本草经 .50.

## 果菜部中品

樱桃味甘平无毒。主调中,益脾气。令人好颜色,美志。

梅实味酸平。主下气,除热烦满,安心,肢体痛,偏枯不仁,死肌。去青黑志,恶疾。生川谷。

蓼实味辛温。主明目温中,耐风寒,下水气,面目浮肿,痈疡。马蓼,去肠中蛭虫。轻身。生川泽。葱实味辛温。主明目、补中不足。其茎,可作汤,主治伤寒寒热,出汗,中风面目肿。薤,味辛,主治金创创败。轻身不饥耐老。生平泽。

水苏味辛微温。主下气杀榖,辟口臭,去毒,辟恶气。久服通神明,轻身耐老。生池泽。

杏核味甘温。主治欬逆上气,雷鸣,喉痹,下气,产乳, 金创,寒心,贲豚。生川谷。 神农本草经 . 51.

#### 果菜部下品

桃核味苦平。主治瘀血,血闭,瘕,邪气,杀小虫。桃华, 杀注恶鬼。令人好颜色。桃枭,微温,杀百鬼精物。桃毛,主 下血瘕,寒热积聚,无子。桃蠹,杀鬼邪恶不祥。生山谷。

苦瓠味苦寒。主治大水面目四肢浮肿,下水。令人吐。生山泽。

水靳味甘平。主治女子赤沃,止血,养精,保血脉,益气,令人肥健嗜食。一名水英。生池泽。

## 米谷部上品

胡麻味甘平无毒。主治伤中虚羸,补五内,益气力,长肌肉,填脑髓。久服轻身不老。叶名青蘘,一名巨胜。生川谷。

麻蕡味辛平。主治七伤,利五藏,下血寒气,多食令人见鬼狂走。久服通神明轻身。麻子,味甘平。主补中益气。久服肥健不老。一名麻勃。生川谷。

神农本草经 . 53.

#### 米谷部中品

大豆黄卷味甘平无毒。主治湿痹筋挛膝痛。生大豆,涂痈肿。煮汁饮,杀鬼毒,止痛。赤小豆,主下水,排痈肿脓血。 生平泽。粟米味苦无毒。主养肾气,去胃脾中热,益气。陈者 味苦,主治胃热,消渴,利小便。

黍米味甘无毒。主益气补中,多热令人烦。

神农本草经 . 54 .

# 米谷部下品

腐婢味辛平。主治痎疟寒热,邪气,泄利,阴不起,病酒头痛。